

Makitibi ki Pol ndangi adi Kolosi je

Ta ki do makitibi ti ki Pol ndangi adi Kolosi je

Kate mari nu, Kolosi e be bo kare ki dɔnangi Aji ti, ki a asi kulə mətər 200, kaw ki lo kibi kadi ti lə be ki Epəji ti be. Basine kin bari-e Turki ngata. Re ə nə o maji 6a, a e be ki Pol ində njane ti nja kare al. E madi-kilə Pol kare ki tɔe nə Epapirasi, ki e dəw ki Kolosi ti wa nɔɔ ə e dəw ki dɔsɔy ki aw ki Poy Ta ki Maji me ti (Kol 1.7; 4.12).

Dəkagiloe ti kin Pol e dangay ti (4.3; 10, 18), dɔmaji ə a e Rom ti. Ə Epapirasi re rɔ Pol ti ɔr-e poy njé kaw-naa je ki Kolosi ti təkɪ nɛ ndo ki go rəbe ti al isi njiyə dande ti nɔɔ ki tɔgine ngay. Əl təkɪ njé ndo nɛe je ka kin əli kadi dəw gər Luwə ə ingə kaji 6a, sɔbi kadi aw nɔ tɔgɪ je ti ki go ndil ti nim, kadi ilə dɔne gin nɛ jibəl be je ti madi tə kijə mɔti je, kində kəm go kuji kuso nɛ je ti ki kuji kɔy nɛ je ti. NGay al go poy ta ti kin 6a, nje kaw kilə Pol ndangi makitibi adi njé kadi-me je ki Kolosi ti, ole mede təkɪ kaji ki Luwə adi-je ki takul Jəju Kirisi kin asi naki ngata. Makitibi kin, dɔmaji ə a ilə-n adi-de ki rəbi lə Tisiki əi ki Onəjim (4.7, 9). J-a j-ingə kəy kəm ta joo me ti:

Go ta kuwə ji-naa ti, ki oyo ki ra Luwə (1.1-14) me kəy kəm ta ti ki dɔsɔy, Pol tɔji Kirisi tə nje kisi dɔ nɛ je ti pəti. Əl təkɪ Kirisi aw ki tɔgɪ dɔ tɔgɪ je ki go ndil ti pəti, e ki karne ba ə e NGar dɔ njé kaw-naa je ti (1.15-2.3). Go ti 6a, Pol ndəji Kolosi je dɔ nɛ ndo ti ki loe al ki dije madi isi njiyəi dande ti (2.4-25).

Me kəy kəm ta ti ki dɔbəy ti, Pol ole me Kolosi je dɔ ne ti ki e njiyə me kisi ki dɔ taa ki sigi, naa ti ki Kirisi, dan njé kun go Kirisi je ti wa nim, dan dije ti ki me kəy je ti ləje ə se dan dije ti ki me 6e ti ba pəti (3.1-4.6). Nje kaw kilə Pol təl ta ta ləne ki ta je ki dɔne ti wa, əl-n ta ndəy be dɔ Tisiki ti nim dɔ Onəjim ti nim, taa ta kuwə ji-naa ki e wa ndangi ki jine kin tɔ (4.7-18).

Nə ndo je ki go rəbi ti al, toi dangi dangi ki dɔkagiloe, dɔkagiloe, nə nə kare ki njé ndo nəe je kin pəti isi sangi, e ta kadi njé kun go Kirisi je sɔli me kadi mede Kirisi ti ki e ki karne ba par ə aw ki tɔgi kin. E mbata kin ə, makitibi ki Pol ndangi adi Kolosi je kin, re isi tidə 6a, a o kadi ta ki me ti sɔbi dɔ dɔkagilo ki je ti 6one wa kin tɔ. Makitibi kin a dɔ Kirisi ti, tɔje kadi aw ki tɔgi dɔ tɔgi je ki go ndil ti pəti, kadi taa-n dije ki isi gin tɔgide ti ilə-de taa.

Kuwə ji-naa

¹ Mi Pol ki nje kaw kilə lə Jəju Kirisi ki go ndigi ti lə Luwə, naa ti ki ngokoje Timote ə ji ndangi makitibi kin, ² j-adi səi dije lə Luwə ki isi me 6e ti ki Kolosi, səi ngakoje je ki adi mesi Kirisi. Kadi Luwə ki Bawje ra səsi maji ə kadi adi səsi lapɪya tɔ.

Pol ra oyo Luwə mbata lə Kolosi je

³ Ji ra oyo Luwə ki Baw Babe ləje Jəju Kirisi, dɔkagilo je pəti ki j-isi j-əl sie ta ki mbata ləsi. ⁴ Ji ra-e oyo tadɔ j-o poy kadi-me ləsi ki adi Jəju Kirisi, ki ndigi ki indigi dije pəti ki əi dije lə Luwə. ⁵ Kadi-me əi ki ndigi-naa kin, ginde e dɔ nə kində me dɔ ti ləsi ki Luwə isi ngəm me dɔrɔ ti adi səsi. Igəri nə kində me dɔ ti kin ki takul kilə mbe Poy Ta ki Maji

ki e ta ki rɔjeti. ⁶ Poy Ta ki Maji kin aw bitɪ tɛɛ rɔsi ti. Ningə asi dɔnangi ba pəti ki kandine, ə aw ki kəte kəte təkɪ to-n dansi ti kin be tɔ, ilə ngire me ndɔ ti wa ki oi poy ta ki ɔji dɔ me-maji lə Luwə, taa igəri me-maji kin tə nɛ ki rɔjeti. ⁷ E Epapirasi, ki e madije ki ngay me kilə ti ə ndo səsi nɛ je kin. E dəw ki dana ki nje ra kilə bəə lə Kirisi dansi ti. ⁸ Ningə e ə əl-je ta dɔ ndigi-naa ti ki NDil Luwə adi səsi.

Kəl ta ki Luwə mbata ti lə Kolosi je

⁹ Be ə, je ka, ndɔ ti wa ki j-o-n poy ta ləsi kin, j-iyə ta kəl ta ki Luwə ki mbata ləsi al. Ji dəje kadi adi səsi igəri ndigi lie maji ki takul gosi ki nɛ gər ki NDile adi səsi. ¹⁰ Lo kin ti, pa njiyəsi a e pa njiyə dije lə Bəbe ki nəl-e me nɛ je ti pəti, a e pa njiyə ki aw ki kəte kəte me kilə ra ki maji ti, ə a itɔgi me gər Luwə ti par par tɔ. ¹¹ Ji dəji Luwə kadi adi səsi tɔgi me nɛ je ti pəti ki takul tɔge ki əti bəl, mba kadi uwəi tɔgisi ba me nɛ je ti pəti, ki kisi dɔ ti ki kore me tɔ. ¹² Irai oyo Luwə ki Bawje ki rɔnəl təkɪ adi səsi asi kingə nɛ nduwə ki isi ngəm me bəkɔ ti lie ki ndole, mbata dije ki əi yəe je. ¹³ E ə, ɔr-je gin tɔgi ti lə til, re səje me bəkɔ ti lə NGone ki nje ndigi lie. ¹⁴ Ki takul NGone kin ə, je-n ki taa kiyə taa, ningə majal je ləje e ki kiyə go kɔ tɔ. ¹⁵ NGon kin, e bana kəm Luwə ki dəw asi ko-e al. E NGon dər nɛ kində je pəti. ¹⁶ Təkɪ rɔjeti, e ki takule ə Luwə ra-n nɛ je pəti ki me dɔrɔ ti nim, ki dɔnangi ti ne nim tɔ. Nɛ je ki dəw oo-de ki kəmne, ki nɛ je ki dəw oo-de ki kəmne al, re ən kɔbe je, ki tɔgi je, ə se njé kɔbe je ba pəti ka, e ki takule ə Luwə ra-n nɛ je kin pəti nim, ta e ki mbata lie nim tɔ. ¹⁷ Kirisi e nɔ nɛ kində je ti pəti. Ningə e ki takule ə, nɛ je pəti ki Luwə rade, ai ki dɔde taa tɔ. ¹⁸ Kirisi ə wa e ki bo dɔ

njé kaw-naa je ti, ki əi darə. E wa ə e kilə ngirə ne, e dəw ki də kəte ki tɛɛ dan njé koy je ti. Be mba kadi-me ne je ti pəti, e ki də kəte. ¹⁹ Tado Luwə ge kadi ne je pəti ki rone ti asi-naa bərərə rə Kirisi ti. ²⁰ Ningə e ki takul Kirisi ə Luwə ndigi kadi dije pəti ki dɔnangi ti ne iləi noji naa ti səne. E ki takul məsi NGone ki ay də kagi-dəsi ti kin ə, Luwə adi lapiya re-n dɔnangi ti ne ə se dərə ti. ²¹ Ningə səi je ki kəte ɔri kagisi kə ta kəm Luwə ti, səi njé bə je lie ki mbata mər ta je ləsi, ki ne rasi je ki majal. ²² Nə ngəsine Luwə ilə noji naa ti səsi ki takul darə Kirisi ki go rəbi koye, mba kadi ra adi tɛɛi ta kəm Babe ti tə dije ki ayi njay nim, ki kanji yoro nim, taa ki kanji ta madi dəsi ti nim tɔ. ²³ Ningə, maji kadi ai də njasi ti me kadi-me ti. Kadi-me kin ə e gin kəy ki ngə ki ai də ti, ki kanji kadi ne madi ɔr səsi aw səsi say ki ne kində me də ti ləsi ki Poy Ta ki Maji adi səsi kin. Poy Ta ki Maji ki e ki kilə mbɛ kadi dije pəti ki dɔnangi ti ne kin. Ningə e ə mi Pol mi nje ra kilə.

Ko lə Pol mba njé kaw-naa je

²⁴ NGəsine, rəm nəl-m mbata ko je ki m-isi m-ingə mbata ləsi. Təki rəjeti, me rəm ti, ki mbata maji lə njé kaw-naa je ki əi darə Kirisi, m-təl ta ko je ki nay kadi Kirisi ingə. ²⁵ Ki mbata njé kaw-naa je ə m-təl-n nje ra kilə bəə ləde. E Luwə ə ilə kilə kin jim ti mba kadi m-ra-n səsi. Kilə kin e kadi m-ilə mbɛ Poy Ta ki Maji lə Luwə kin ba pəti madi səsi. ²⁶ E ne ki to lo bəyɔ ti ki rə gin dije ti pəti ki dəkagilo je pəti, nə ngəsine tɛɛ ki dəe adi dije ləne gəri. ²⁷ Tado Luwə ndigi kadi gəri ne ki oji kadi ra ə e ne ki maji ki əti bəl kin. E ne ki kində dəe dana mbata maji lə dije pəti. Ne ki to lo bəyɔ ti ki Luwə tɛɛ ki dəe e Kirisi ki

isi mesi ti, ə adi igəri ay njay təkı a səi me təba ti lə Luwə kin. ²⁸ E Kırısı kin ə, j-isi j-ilə mbe Poy Ta ki Maji lie ki rəbi ndor mbi dije pəti, ki rəbi ndo-de ne ki takul kəm-kədi ki Luwə adi-je. MBa kadi əi pəti təli dije ki tōgi gangi me Kırısı ti. ²⁹ MBata kin ə, m-isi m-ra-n kilə nim, m-isi rə-n nim, ki tōgi Kırısı ki isi ədi rəne rəm ti.

2

¹ Təkı rəjeti m-ndigi ngay kadi igəri rə ki ngə ngay ki m-isi m-rə mbata ti ləsi, ki mbata lə Lawodise je, taa ki mbata ti lə ndəge je pəti ki ooi mi ki kənde al kin tə☆. ² Rə kin, m-rə kadi m-ilə-n dıngəm mede ti, ə kadi indəi rəde naa ti kare ba me ndigi-naa ti, taa kadi ingəi ne gər ki a adi-de me ki tı kati, kadi gəri ne lə Luwə ki to lo bəyə ti, ki e Kırısı kin nim tə. ³ E rə Kırısı ti kin ə dəw a ingə gosi je ki ne gər je ti. ⁴ M-əl ta kin be mba kadi dəw madi ədi səsi ki bal ta ki tane ti al. ⁵ E ki rəjeti, kadi darəm e say səsi, nə ndilm e naa ti səsi. Ningə rəm nəl-m ngay kadi m-o səsi, ai də njasi ti, taa uwəi tōgisi ngə me kadi-me Kırısı ti tə.

Ne je pəti e rə Kırısı ti

⁶ NGa ningə, təkı itaai Jəju Kırısı, ki Babe mesı ti, maji kadi injiyəi sie naa ti. ⁷ Həi ngirəsi rəe ti, ə adi kisi ki də taa ləsi e kəy ki indəi dəe ti tə. Ningə kadi ai də njasi ti me kadi-me ti ki go ne ndo ti ki ingəi, ə kadi irai oyo Luwə ki də-naa ti də-naa ti tə. ⁸ Indəi kəm-kədi də rəsi ti, kadi dəw madi ədi səsi ki ne gər ki ngom, ki ndae goto ki e ne gər lə dije ki dənangi ti ne kin al. E ne gər ki ngire e də ne jibəl 6e ti lə dije ki də tōgi ndil je ti ki majal ki dənangi ti ne, 6i e də

☆ 2:1 4.13

Kirisī ti al[☆]. ⁹ Tado ne je pəti ki rə Luwə ti, tade asi-naa bərərə rə Kirisī ti. ¹⁰ NGa ningə səi ingəi ne je pəti asi-naa rə Kirisī ti, ne ki du səsi goto. Kirisī ki e ki bo də təgi je ti, ki də njé kəbe je ti pəti.

¹¹ E me kində rə naa ti ki Kirisī kin ə itəli dije ki njé kijə mətide. Ningə e kijə məti ki dəw ba ijə ki jine al, nə e kijə məti ki Kirisī wa ə ijə, mba kadi ər-n ngur darə ki isi aw səsi ki majal ti kin kə. ¹² Ki rəbi lə batəm ki irai, dibi səsi naa ti ki Kirisī, ningə uni səsi naa ti sie lo koy ti tə tado adi mesi də təgi ti lə Luwə ki tee sie dan njé koy je ti. ¹³ Səi ki kəte, səi dije ki koy mbata majal je ləsi, səi dije ki səi *Jipi je al, ijəi mətisi al tə, nə basine, Luwə təl adi isi kəm ba naa ti Kirisī. Luwə iyə go majal je ləje pəti kə. ¹⁴ Luwə buji ne raje je ki to me makitibi, ki isi səki dəje, taa əsi-je ta ki go rəbi lə ndu-kun je kin kə; Luwə tuji-de kə ki go rəbi bə-de də kagi-dəsi ti. ¹⁵ E be ə, Luwə ər-n təgi ndil je ki majal ki təgi ki isi ɔi bə kə[☆], ilə rəsəl dəde ti ta kəm dije ti, adi me njiyə təti rə ti lə NGone, ki e Kirisī, əi je njiyəi tə dangay je. ¹⁶ Lo kin ti, adi dəw madi gangi ta dəsi ti mbata ne kuso ə se ne kay al, taa ɔji də ndə kə nay ə se ndə taa kəə lə Jipi je al. ¹⁷ Ne je kin pəti əi ndil ne je ki a rəi, nə ne ki rəjeti, e darə Kirisī. ¹⁸ Oti kadi adi dəw madi təl rə ki təti ləsi kin yəne ti. Adi e dije ki njé ra rəde njé də səl ti, isi əsi dəde nangi nɔ malayka je ti, əi dije ki njé koo ne ki koo me ni ti tə ne ki ngay. Əi dije ki tagade e taga ki a də dəw ti wa par, adi isi indəi gude. ¹⁹ Dijee kin, mbati kuwə ki Kirisī ki e ə e də kin. Nə təkī rəjeti, e ki takul Kirisī ki e də kin ə ngan rə je pəti ingəi ne ki kadi a ra səde. E ki takule ə tal je ki singə je isii ta naa ti isi rai kilə. Ningə e Luwə ə e nje ra kadi darə

☆ 2:8 Gal 4.3 ☆ 2:15 1.16

kin tɔgi. ²⁰ Sɔi ki koy naa ti ki Kirisi, adi sɔi ki taa kiyɛ taa ji tɔgi ndil je ti ki majal ki me duniya ti. NGA ra ban ə, to tɔki ji kisisi ki dɔsi taa, isi gin tɔgi ti lə nɛ je kin bəy be ə? MBa ri ə itəli rɔsi gin ndu je ti ki ə nə: ²¹ «UN nɛ kin al! Ɔdi nɛ kin tai ti al! adi ji ɔdi nɛ kin al!» ²² Nɛ je kin pəti əi nɛ je ki a tuji kɔ go kilə ti ki dəw ra-n. Ningə əi ndu-kun je ki nɛ ndo je ki go nɛ gər ti lə dije. ²³ Tɔki rɔjeti, kun-ndu je kin, tɔki o ba, e nɛ ki tɔji gosi, mbata tɔji rəbi ra Luwə lə dəw ki ra, rəbi səl dɔ ki rəbi kində tɔgi dɔ darɔ rɔ ti, nə ke ə e ndu-kun je ki ndade goto, toi mbata təl ngur darɔ par.

3

Kisi ki dɔ taa ki sigi ki Kirisi

¹ Tɔki uni səsi lo koy ti naa ti ki Kirisi, maji kadi isangi nɛ je ki taa dɔrɔ ti, ki e lo ki Kirisi isi ti, dɔ ji kɔ Luwə ti kin*. ² Iməri ta dɔ nɛ je ti ki dɔrɔ ti, bi dɔ nɛ je ti ki dɔnangi ti ne al. ³ Tado sɔi dije ki oyi, ningə kaji ləsi e ki bɔyɔ naa ti ki Kirisi rɔ Luwə ti. ⁴ Dɔkagilo ki Kirisi ki e kisi ki dɔ taa ləsi a tɛɛ ningə, sɔi je ka a tɛɛi sie me tɔba ti ki taa lo.

Kisi ki dɔ taa ki kate ki e ki bone

⁵ Maji kadi idibi nɛ je pəti ki dɔnangi ti ne, ki to rɔsi ti: adi ə sangi-naa ki lo kaya ti, ki nɛ ra ki to nje, ki ngur darɔ ki əti bəl, ki bo nɛ je ki majal, ki ra ta nɛ kingə, ki e yo ki ra. ⁶ E nɛ je kin ə isi re ki wongi lə Luwə dɔ dije ti ki njé tɔ-e rɔ. ⁷ E kin ə, e pa njiyəsi je ki kate, loki isi me majal ti bəy. ⁸ Nə ngəsine, maji kadi imbati nɛ je kin pəti, adi e wongi ki ra, ki nɛ ra ki dɔ gu ti, ki me ndul, ki nɛ taji, ki ta je ki go rəbe ti

* 3:1 Pa je 110.1

al ki isi tee tasi ti. ⁹ Oti kadi əli-naa ta ngom. Tado sai dije ki ɔri koki daw rɔsi ti kɔ, ki kilə rae je ngata. ¹⁰ Ningə ngɔsine iləi daw ki sigi rɔsi ti, daw ki Luwə ki nje kində ne je isi təl-e ki sigi ti taa taa, kadi titi-naa sie, kadi tee gər-e ti ki rɔjeti. ¹¹ Me kisi ki do ta ti ki sigi kin, kər kəm-naa goto, mbɔ dije ti ki əi *Jipi je ə se njé je ki əi Jipi je al, mbɔ njé kijə mətide ki njé kijə mətide al. Kəl kə nə mba ə se daw ki kəm tee al, goto, kəl kə nə bəə ə se daw dərɔne, goto. E Kirisi par ə e ne je pəti me ne je ti pəti.

¹² Sai dije ki Luwə mbəti səsi, sai dije lie ki ndigi səsi. E mbata kin ə, maji kadi awi ki koo kəm-tondoo lənaa rɔsi ti, kadi sai njé ra maji, njé kilə do nangi, kadi sai dije ki səl ləm ləm, dije ki njé kore me. ¹³ Maji kadi isi do ti ki naa. A re daw madi aw ki ta ki to rəe do ngokɔe ti ə, maji kadi iyəi go kɔ yo ki ne adi-naa, təkɪ Kirisi iyə-n go majal je ləsi kɔ kin be tɔ. ¹⁴ Ne ki e do ne je ti pəti, e kadi ndigi-naa e kibɪ rɔsi. E ə a ra kadi kində rɔ naa ti ləsi a e ki rɔjeti. ¹⁵ Kadi lapɪya lə Kirisi ɔ be ngamesi ti. E ki mbata lapɪya kin ə Luwə bar-n səsi, kadi itəli darɔ ki kare. Ningə kadi sai njé ra oyo Luwə. ¹⁶ Maji kadi ta lə Kirisi rɔsi mesi. Ningə kadi indoi-naa ne je, indəji-naa je ki yo ki ne ki gosi ki ngay. NGA ningə, kadi osi pa, iləi tɔji do Luwə ti ki oyo ki ra me Pa je ti ki me makitibi ti lə Luwə, ki me pa kilə dɪngəm me naa ti, ki me pa je ti ki NDil Luwə adi səsi. ¹⁷ Ne je pəti ki isi irai, ki ta je pəti ki isi əli, maji kadi e me tɔ Bəbe Jəju ti, nga ningə kadi irai oyo Luwə ki takule.

Kisi njé kadi-me je me kəy ti

¹⁸ Sai dəne je ki njé ngaw, maji kadi iləi dɔsi gin tɔgi ti lə ngawsi je təkɪ sɔbi kadi irai ta kəm Bəbe ti.

19 Səi ngaw dəne je, maji kadi indigi nesi je. Adi rəsi ati səsi dode ti al. 20 Səi ngan je, maji kadi itəli rəsi go ta ti lə njé kojisi je me ne je ti pəti, tadə e ne ki nəl Bəbe. 21 Nینگə səi baw ngan je, oti kadi irai adi wongi ra ngansi je, tadə re e be ə, mede a tuji. 22 Səi bəə je, maji kadi itəli rəsi go ta ti lə bəsi je ki dənangi ti ne kin. Nینگə, oti kadi irai tə kilə kədi kəm-naa taga ne par kadi nəl dəw, nə kadi irai ki me ki kare, ki bəl NDil Bəbe. 23 Kilə ki to ban ki isi irai ba, kadi irai ki me ki maji tə kilə lə Bəbe ə isi irai, bi tə kilə lə dəw, al. 24 Nینگə kadi igəri təkə Bəbe a adi səsi ne maji ki ngəm mbata lə dije ləne kin, tə ne kigə go jisi. Tadə Bəbe ki rəjeti e Jəju Kirisi. 25 Ki rəjeti, dəw ki ra ne ki go rəbe ti al, a tətə kandi ne ra ki go ti al ləne kin, tadə kər dəw dana goto rə Luwə ti.

4

1 Səi ki awi ki bəə je, maji kadi irai-de maji, ki go rəbi ki dana. Nینگə kadi səi ka igəri təkə, awi ki Basi dərə ti noq to.

Ta kəji ki də kaw kilə ti

2 Maji kadi uwəi təgisi ba me kəl ta ti ki Luwə, kadi kəl ta ki Luwə ra adi isi dəgi ti, irai oyo Luwə ki dənāa ti dənāa ti. 3 NGa nینگə, əli ta ki Luwə ki mbata ləje to, kadi Luwə tēē ta rəbi noje ti kadi j-əl ta lie, kadi j-ilə-n mbe ne ki to lo bəyə ti oji də Kirisi, ki m-ton dangay ti kin. 4 Əli ta ki Luwə kadi m-əl ta lə Kirisi kin ay njay, təkə səbi kadi m-əl-n. 5 Maji kadi kəmsi ədi də pa njiyəsi ti ki rə dije ti ki adi mede Kirisi, al. Nینگə kadi dəkagilo ki Luwə adi səsi kin, irai kilə, bi adi man kə kare al. 6 Maji kadi ta kəlsi e ta kəl ki maji ki dəkagilo je pəti, ki kadi dəw ینگə ne ki to sie

soti me ti. Kadi igəri lo kuji tur ta dije ti ki adi mede Kirisi, al.

⁷ NGokom ki nje ndigi ləm, Tisiki a əl səsi ta je pəti ki dəm ti adi oi. Tisiki✧ e nje kilə bəə ki a də njane ti, taa e madi-kiləm me kilə ti lə Bəbe nim tə.

⁸ NGa ningə, m-ilə sie be mba kadi adi səsi poyje adi oi nim, taa ki mba kadi ilə dingəm mesi ti nim tə.

⁹ Onəjim✧ ki e ngokoje ki dana, ki ji ndige ngay kin, a uwə sie rəbi. Onəjim e dəw rəsi. Əi ki Tisiki a əli səsi ne je pəti ki isi rai ne rəje ti ne adi oi.

Kuwə ji-naa ki dəbəy ti

¹⁰ Madi dangay ləm Arisitarki✧ uwə jisi, taa Marki✧ ki ngonan Barnabasi✧, ki ingəi ta kəji je ki oji dəe kin ka uwə jisi tə. Re aw tēē rəsi ti bə, kadi uwəi-e ki rəsi ti maji. ¹¹ Jəju, ki isi bəri-e Jusitusi uwə jisi tə. MBQ *Jipi je ti ki adi mede Kirisi kin, əi je kin par ə isi rai səm kilə ki oji kəbe lə Luwə ne. Əi je kin ə əi togim ki ngay. ¹² Eparirasi✧ ki e dəw ləsi uwə jisi tə. Eparirasi e bəə kilə lə Jəju Kirisi, ki iyə ta rə al ki mbata ləsi, me kəl ta ti ki Luwə. Əl ta ki Luwə mba kadi ai də njasi ti, kadi səi dije ki təgi gangi me NDil ti, taa kadi səi bəsi kadi irai ndigi ra je lə Luwə pəti tə. ¹³ M-ma naji lə Eparirasi təkı adi rəne kə ngay mbata ti ləsi, ki mbata lə njé kaw-naa je ki Lawodise ti nim, taa njé ki Iyerapolisi ti nim tə. ¹⁴ Madije ki ngay, Luki, ki e dəkıtur əi ki Dəmasi uwəi jisi tə✧. ¹⁵ Uwəi ji ngakoje je ki Lawodise ti, naa ti ki Nımpa əi ki njé kaw-naa je me kəy ti lie adi-je tə. ¹⁶ Loki itidəi makitibi kin ningə, iləi adi njé

✧ 4:7 Knjk 20.4; Ep 6.21-22 ✧ 4:9 Plm 10-15 ✧ 4:10 Knjk 19.29; 27.2 ✧ 4:10 Knjk 12.12, 25; 13.13; 15.37-39 ✧ 4:10 Knjk 9.27; 11.22, 30 ✧ 4:12 1.7 ✧ 4:14 2Tim 4.10, 11; Plm 24

kaw-naa je ki Lawodise ti ka tidai to. NGa ninga e ki njé ki Lawodise ti a ilai adi sasi kin, sai ka itidai to. ¹⁷ Ninga kadi eli Arsipi[☆] adi inda kamne go kilé ti la Babe ki inga kin, kadi ra kile maji. ¹⁸ Ta kuwá ji kin e mi Pol a wa a m-ndangi. Kadi mesi oy dam ti al, taki m-to dangay ti ne. Kadi me-maji la Luwá e naa ti sasi. Amen!

☆ 4:17 Plm 2

KĒLƏ-MĪNDĪ KĪ SĪĠ

New Testament in Bedjond (CD:bjv:Bedjond)

copyright © 2011 Wycliffe Bible Translators, Inc.

Language: Bedjond

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Bedjond

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2021-11-01

PDF generated using Haiola and XeLaTeX on 11 Nov 2022 from source files
dated 29 Jan 2022
a4f34a03-c89e-55e0-bc3f-22f7829df823